

Gojri News Bulletin
15 February 2026 at 1700 Hrs

ایونینگ گو جری نیوز بلیٹن مورخہ 15 فروری 2026

یوہ آکا شوانی جموں ہے عبدالمجید تے باغ علی طاہر تیں خبر سنو۔ پہلاں خاص خاص خبر۔

*1- وزیر اعظم نریندر مو دی گو کہنو ہے جے مرکزی کابینہ غی طرفوں یو سی ایف نانہ منظوری دین نال آعلیٰ معیار غا شہری ترقیاتی ٹنچہ نانہ فروغ مل سکے گو۔

*2- حالیہ برفباری غا نتیجہ مانہ بند پئی بہدرواہ۔ بسوبلی شاہراہ نانہ گڈیاں غی آٹو جائی واسطے فر تیں کھول دتو گیو ہے۔

*3- مہا شوراتری غو تہوار پورا جموں ڈویزن مانہ بڑی عقیدت تے مذہبی جوش و جذبہ سنگ مانیو جا رہیو ہے۔

*4- ٹی 20 عالمی کپ کرکٹ ٹورنامنٹ غا اک اہم مقابلہ مانہ آج بھارت غو مقابلو اپنا روایتی حریف پاکستان سنگ ہو رہیو ہے۔

*5- تے محکمہ موسمیات نے آندہ 17 فروری نانہ گج اک اچا پہاڑی علاقان مانہ مختصر عرصہ غی برفباری غی پیشگوئی کی ہے۔

خبران غی تفصیل نال پہلاں باغ علی طاہر۔

PM UCF

وزیر اعظم نریندر مو دی نے مرکزی کابینہ غی طرفوں شہری للکاراں بارے اک لکھ کروڑ روپیاں ور مبنی فنڈ یو سی ایف نانہ منظوری دین غی سراہنا کی ہے۔ سماجی میڈیا غی اک پوسٹ مانہ جناب مو دی گو کہنو تھو جے اس رقم غی منظوری سنگ بازار غا مالی دباؤ، نجی شراکت داری، تے شہریاں غی بہبود ور مبنی سدھار آنیا جا سکین گا، تانجے آعلیٰ معیار غا شہری ترقیاتی ڈھانچاں نانہ فروغ مل سکے۔ ان گو کہنو تھو جے اس اقدام سنگ ملک غی اقتصادی ترقی با بدہ مانہ شہراں غو کلیدی کردار باندے آسکے گو۔ داخلہ تے شہری معاملان بارے مرکزی وزارت غی طرفوں شروع کی گئی یو سی ایف غی اس اسکیم غو مقصد پائیدار۔ فائدہ مند، جامع تے ماحول موافق شہر تعمیر کرنو ہے۔

Bhaderwah- Basohli NNHW

مُشکل موسمی حالات غے باوجود سرحدی سڑک تنظیم بی آر او غی طرفوں کی جان آلی تیز تر تے مجموعی کوششاں غی وجہ نال بہدرواہ بی بسوبلی سڑک بحال کر دتی گئی ہے ۔ جس نال ڈوڈہ تے کٹھو عہ ضلعان بشکار رابطو قائم ہو سکیو ہے ۔ اک دفاعی ترجمان نے اس بارے جانکاری دیتاں واں دسیو ہے جے حالیہ برفباری غی وجہ نال شاہراہ غا چہتر گلا غا مقام ور گڈیاں غی آئو جائی مانہہ رکاوٹ آگئی تھی۔ جس غی وجہ نال قریب 65 کلو میٹر غا سڑک غا حصہ نانہہ عارضی طور ور بند کر دتو گیو تھو۔ پیشہ وارانہ تیاریاں تے ہر موسم مانہہ سڑک رابطو بحال رکھن غو ارادو ظاہر کرتاں واں انہاں نے دسیو ہے جے 35 سرحدی سڑک تعمیراتی کمپنی، آر سی سی غی طرفوں بی آر او غے تحت پروجیکٹ سمپرک شروع کیو گیو ۔ جس غے تحت آساپتی گلیشیر تے کیلاش پہاڑ غے نزدیک سڑک وروں برف ہٹان غو کم تیزی سنگ شروع کیو گیو تھو۔

Mahashivratri

مہاشیوراتری غو تہوار اج جموں ڈویژن غا بکھ بکھ مندران تے دوجا مذہبی مقامات ور بڑی عقیدت تے جوش و جذبہ سنگ منایو جا رہیو ہے ۔ مندران مانہہ سویر تیں ہی عقیدت منداں غی خاصی پیڑ دیکھی جا رہی ہے ۔ ضلع اُدھم پور غا شیو مندران مانہہ وی عقیدت منداں غی خاصی تعداد دیکھی گئی ہے ۔ اس سلسلہ مانہہ پیش ہے مہارا مائندہ غی یاہ رپورٹ۔۔۔ بانٹ۔۔۔ اُونہاں سانہہ مانہہ وی مہاشیوراتری غو تہوار بڑی عقیدت تے مذہبی احترام سنگ منایو جا رہیو ہے ۔ سانہہ تیں مہارا نمائندہ نے مزید جانکاری دیتاں واں دسیو۔۔۔ بانٹ۔۔۔ ریاسی مانہہ وی یوہ تہوار ضلع غا بکھ بکھ علاقان مانہہ مذہبی جوش و خروش سنگ منایو گیو ۔ اس سلسلہ مانہہ بڑی تقریب ریاسی غا آپ شنبھو مہادیو مندر مانہہ منعقد ہوئی۔ آکاشوانی نیوز سنگ گل کرتاں واں اک پجاری غو کہنو تھو ۔۔ بانٹ۔۔۔ ضلع پونچھ مانہہ وی شیوراتری غو تہوار بڑی عقیدت تے مذہبی جوش و جذبہ سنگ منان غی اطلاع ملی ہیں۔ اس بارے مزید جانکاری دے رہیا ہیں سناتن دھرم سبھا پونچھ غا صدر کھیتر پال شرما۔۔۔ بانٹ۔۔۔

Innovation-JU

جموں یونیورسٹی غا بٹرنانہہ باہدو دین تے جدید کاری ور مبنی کاروباری ترقی بارے مرکز ایس آئی آئی ڈی سی غی طرفو آئندہ 16 تے 17 فروری نانہہ جدید کاری ور

مبنی اینوویشن 1.0 غانا سنگ قومی سطح غی 2 روزہ بیکتھان منعقد کی جا رہی ہے۔ اس بیکتھان غا انعقاد غو مقصد طالب علماں مانہہ جدید کاری تے کاروبار نانہہ فروغ دینو ہے۔ یوہ پروگرام پوری رات چلے گو، جت جدید کار طالب علم، اُستاد تے صنعتی شخصیات جدید کاری کاروبار غے متعلق حائل مشکلات غا حل کڈھن تے تخلیقی صلاحیتاں مانہہ بابدو کرن جیسا کم مل جُل غے انجام دیں گا۔

مزید خبراں نال عبدالمجید ور اُس تیں پہلاں یوہ پیغام۔(یہ خبر تم آکاشوانی جموں تیں سُن رہیا ہیں، تے یہ خبر مہاری ویب سائٹ نیوز آن آئیر ڈاٹ گوو ڈاٹ ان ور وی دستیاب ہیں، (اس تیں یہ خبر مہاری موبائل ایپ تے ڈی ٹی ایچ ور وی دستیاب ہیں

India Pak T-20

ٹی 20 عالمی کپ کرکٹ مقابلاں غا سلسلہ مانہہ اج بھارتی کرکٹ ٹیم غو مقابلو اپنا روانتی حریف پاکستان غی کرکٹ ٹیم نال اج شام نانہہ کھیڈیو جائے گو۔ مُلک پھر غے نال نال جموں مانہہ کرکٹ غا نوجوان شائقی اس دلچسپ کرکٹ مقابلہ غو بے تابی نال انتظار کر رہیا ہی۔ نوجواناں مانہہ حب الوطنی غو جذبو تے کھیڈاں غو جوش تے جذبو واضع طور ور نظر آرہیو ہے تے اک نوجوان بھارتی کرکٹ ٹیم غی مدح سرائی گیٹار بجا غے تے گیت گا غے کرنو نظر آيو۔ جموں مانہہ کرکٹ غا کُجھ شائقین نے اس اعتماد غو اظہار کیو جے بھارتی کرکٹ ٹیم اس مقابلہ مانہہ بہتر کارکردگی پیش کرے گی انہاں نے کہیو۔۔۔ بانٹ۔۔۔

Radio Kisan Divas

آکاشوانی جموں نے ریڈیو کسان دیوس آکاشوانی غا احاطہ مانہہ جوش و خروش سنگ منایو۔ اس موقع ور اک متاثر کُن تے بھر پور شرکت آلی تقریب غو انعقاد کیو گیو۔ جس مانہہ ترقی پسند کساناں، ذرعی ماہرین تے متعلقہ حکماں غا اہلکاراں نے شرکت کی۔ ڈی ڈی جی انجینئرنگ آکاشوانی جموں روی کانتھا بابو نے خطاب کرتاں واں جدید ذرعی ٹیکنالوجی اپنان غی اہمیت ور زور دتو۔ کے وی کے سانہہ غا انچارج ڈاکٹر سنجے کھجوریہ نے اپنا خطاب مانہہ کریشی وگیان کیندر سانہہ غی طرفوں کیا گیا بکھ بکھ ذرعی اقدام غو تفصیلی جائزو پیش کیو گیو۔ اسسٹنٹ ڈائریکٹر پروگرام آکاشوانی جموں بچن لال نے اپنا خطاب مانہہ یقین دوايو جے آکاشوانی جموں اپنا بکھ بکھ پروگراماں غے ذریعے بروقت قابل بھروسہ تے کساناں واسطے خاص معلومات غی ترسیل جاری رکھے گو۔

DIC Ramban Capus

ضلع صنعتی مرکز رام بن ضلع مانہ بکھ بکھ سرکاری صنعتی تربیتی ادارا مانہ بیداری
غا بکھ بکھ کیمپس تے ورکشاپ منعقد کر رہیو ہے۔ ورکشاپ غے دوران عام لوکاں نانہ
پی ایم ای جی پی، ریمپ اسکیم، پی ایم وشو کرما تے ڈی آئی سی رام بن غے ذریعے
محکمہ صنعت تے تجارت غی طرفوں لاگو کی جارہی دوجی خود روز گار اسکیمیاں
غے تحت اڈیم رجیسٹریشن غا بارہ مانہ آگاہ کیو گیو۔ بے روز گار نوجواناں نانہ مصنو
عات تیار کرن تے سروس دوباں شعباں مانہ پی ایم ای جی پی غے تحت مالی امداد
غے ذریعے اپنو روز گار شروع کرن واسطے دستیاب فائدا تے سبسڈی غا بارہ مانہ
دسیو گیو۔ اس غے علاوہ دوجی اسکیمیاں جن مانہ این سی ایس ایس تے جے اینڈ کے
اڈسٹریل پالیسی غے تحت مراعات شامل ہیں غا بارہ مانہ وی جانکاری دتی گئی۔ ڈی آئی
سی رام بن غا جنرل میجر رویندر کمار نے اس بارے جانکاری دیتاواں کہیو۔ بانٹ۔۔۔

Weather

محکمہ موسمیات نے آئندہ 17 فروری نانہ گجھ بالائی علاقاں مانہ ہلکی برفباری غی
پیشنگوی کی ہے۔ اس غے علاوہ محکمہ نے یوہ وی دسیو ہے جے 25 فروری
توڑی موسم عام طور ور خشک رہن غی توقع ہے تے کسے بڑی موسمی تبدیلی غو
کوئی امکان نہیں ہے۔ لوکاں تے مسافراں نانہ مشورو دتو گیو ہے جے وے مقامی
پیشنگوئیاں نال جڑیا رہیں۔ اس بارے مزید جانکاری دے رہیا ہیں محکمہ موسمیات غا
ڈائریکٹر مختار احمد۔۔۔ بانٹ۔۔۔

اس غے نال ہی خبراں غو یوہ بلیٹن ختم ہوؤ۔